

UVODNA RIJEČ

EDITORIAL

Za Savez udruženja građana geodetske struke u Bosni i Hercegovini, ali i cjelokupnu bosanskohercegovačku geodetsku zajednicu, 2019. godina je imala višestruki značaj. Za nju se vežu dva važna jubileja, koji zorno svjedoče o dugoj i bogatoj tradiciji našeg Udruženja, te o izuzetnim rezultatima njegovog djelovanja.

Februara mjeseca davne 1919. godine u Sarajevu je osnovano Udruženje geometara Bosne i Hercegovine, koje će u narednih 100 godina kontinuirano djelovati pod različitim imenima ali uvijek s istim ciljem zaštite, promocije i razvoja geodetske struke i djelatnosti u našoj zemlji. Današnje Udruženje, kao pravni sljednik prethodnih geodetskih društvenih organizacija, baštini dugu tradiciju svojih prethodnika i nastavlja sa misijom aktivnog doprinosa napretku geodezije u Bosni i Hercegovini. Ove godine Udruženje je dobilo novo rukovodstvo, pred kojim je mnogo posla kako bi se SUGGSUBIH vratio na mjesto koje mu pripada. Etabliranje Udruženja kao društvene organizacije od značaja i s bitnom ulogom u struci, zahtijevat će zajednički napor i angažman cjelokupnog članstva, geodetskih institucija i organizacija. Ostaje nada da će se geodete širom BiH identifikovati sa Udruženjem i dati svoj doprinos u borbi za stvaranje boljeg okruženja, u kojem će se stručnost i rezultati rada adekvatno cijeliti i nagrađivati. Poseban problem, čijem se rješavanju mora hitno pristupiti, jeste sve veći odlazak kvalitetnih mladih geodetskih kadrova iz BiH u zemlje zapadne Evrope. Mlađa geodetska populacija bit će motivirana za ostanak u domovini samo ako mogu dostojno živjeti od svog rada.

Ovu godinu obilježilo je i objavljivanje jubilarnog 50. broja Geodetskog glasnika, vodećeg bosanskohercegovačkog časopisa iz oblasti geodezije i svih područja koja se bave informacijama o prostoru, čiji je prvi broj objavljen davne 1967. godine. Zanimljivo je pratiti evoluciju te publikacije, pokrenute u formi skromnog strukovnog glasila, sve do respektabilnog naučno-stručnog časopisa, koji je prevazišao granice Bosne i Hercegovine i postao prepoznat i priznat u internacionalnim okvirima. U ovoj godini imenovan je novi glavni i odgovorni urednik Geodetskog glasnika, članovi uredništva i međunarodnog uredničkog odbora. Novoimenovano uredništvo ima veliku odgovornost i obavezu da stvori uslove za neometano izlaženje časopisa u budućnosti, uz povećanje njegove kvalitete i međunarodne prepoznatljivosti. U izdavanju Geodetskog glasnika trebala bi sudjelovati cjelokupna geodetska zajednica u BiH, tj. on ne bi trebao biti briga samo nekolicine pojedinaca. Od velike je važnosti da kolege što više objavljuju rezultate svojih naučnih istraživanja, svoje vrijedne spoznaje, iskustva, novosti i zanimljivosti u Geodetskom glasniku, na dobrobit cijele struke.

Dosadašnjem predsjedniku i sekretaru Udruženja, glavnoj i odgovornoj urednici i tehničkom uredništvu Geodetskog glasnika upućuje se iskrena zahvala za naporan, sistematski i dugotrajan rad, koji je polučio značajne rezultate i koji će zasigurno na najbolji mogući način biti nastavljen od strane novoimenovanog vodstva.

Finansijsku pomoć za pokrivanje troškova štampanja ovog broja časopisa pružili su Federalno ministarstvo obrazovanja i nauke, geodetske kompanije GeoWild Sarajevo, Geodet Sarajevo, Zedis Zenica, AMG Visoko i Općina Cazin, na čemu im se posebno zahvaljuje.

Kao i u prethodnih 49. brojeva i ovaj okrugli, 50. broj Geodetskog glasnika donosi mnoštvo zanimljivih tema iz kojih se mnogo toga može naučiti i saznati, te će sigurno svaki čitalac pronaći ponešto sebi zanimljivo.

Nedim Tuno

Glavni i odgovorni urednik Geodetskog glasnika